

իշխողին Կիպրոսի. այլ յետոյ լուեալ զի ընկերք նոցա պատրաստին 'ի պատերազմ ընդդէմ այլազգեաց՝ յետս դարձան:

Գուշակի 'ի նախ եղելոցն զի յայսմ եւս նուագի տեղի տայր Լեւոն նուիրակացն. իսկ կոմսն յամառեալ սալացեալ մնայր. եւ գիտելով զի ոչ կարացէ գդէմ ունել միաբանելոց իշխանաց ընդ Լեւոնի, խորհեցաւ խորհուրդ խորամանկ՝ հնարել գերծանել 'ի քաղաքական իշխանութենէ Քահանայապետին: Լուեալ զառումն Կ. Պօլսի եւ զամբառնալ Պալտուինի Ֆլանտրացոյ 'ի գահ կայսերական, ել գնաց զաղտ 'ի Պտղոմայիս՝ առ տիկինն նորին Մարիամ, եւ 'ի ձեռս նորա՝ իբրեւ փոխանորդի կայսեր՝ երդուաւ հպատակութիւն, ըստ աւատական օրինաց, որով դատ իւր այնուհետեւ ձգիւր յատեան կայսերն. եւ դարձաւ՝ ոչ ումեք առ ժամն 'ի վեր հանելով զբանն. մանաւանդ զի եւ դշխոյն մինչ չեւ պսակեալ թագիւ՝ դազադաւ տարեալ եղեւ 'ի Կոստանդնուպօլիս. († 29 ամսեան օգոստոսի, 1204)¹⁶²:

Որպիսի՝ ինչ եղեն ելք բանախօսութեան եւ դատի չորից նորոց նուիրակաց Քահանայապետին, ոչ յայտնեցաւ մեզ, վասն պակասելոյ թղթոց Դիւանաց նորին, (յորոց վերոգրեալքդ ծանուցան), յերկոսին ամսն 1205-6. ոմանց թուեցաւ թէ 'ի նմին յառաջնում ամին (1205) եմուտ Լեւոն բռնութեամբ յԱնտիոք. այլ հաւանագոյն է, թէ զիջանելով 'ի բանս նուիրակացն, (զի կամէր միշտ հաճել զառաքող նոցին, կամ յառտնին հոգս պարապեալ), թոյլ արար առ փոքր մի, եւ յայնմ ժամանակի կոմսն՝ փոխանակ ամոքմամբ յինքն յանկուցանելոյ զԱնտիոքացիսն՝ ստիպէր խստութեամբ ուրանալ իսպառ զիրաւունս ժառանգութեան եղբորորդոյ իւրոյ. եւ այսու առաւել եւս ուծացուցանէր յիւրմէ գողջախոհսն, մանաւանդ զուխտ եկեղեցւոյն եւ զգլուխ նոցին զպատրիարքն, որոյ եւ հպատակ էր ինքն կոմսն ըստ աւատական հրահանգաց, նաեւ սան էր նորին, միանգամայն եւ առ 'ի գդէմ ունել Լեւոնի՝ ջանայր յանկուցանել յինքն զԳենուացիս, շնորհելով նոցա ազատ վաճառականութիւն իշխանութեան Անտիոքայ, եւ վարձելով 'ի նոցանէ երիս բերդանաւս 'ի պէտս ծովամարտի կամ ասպատակութեան, 300 մարտիկս եւ 3000 բիզանդ ոսկի

¹⁶² **Հուրդէր**, Ը, ըստ Ալպերիկոսի: